



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ
ՔՆՆՈՂ ԱՆՁ

ք. Երևան

27.09.2018թ.

Ո Ր Ո Շ ՈՒ Մ

ՀՀ գնումների հետ կապված բողոքներ քննող անձի
թիվ ՍՅ-ԱՄ-2018/125

Հայաստանի Հանրապետության գնումների հետ կապված բողոքներ քննող անձ Միեր Անանյանս, ուսումնասիրելով Հայաստանի Հանրապետության ֆինանսների նախարարության 27.08.2018թ. թիվ 01.1/26-3/15357-18 և 18.09.2018թ. 01.1/26-/[1256766]-18 գրություններով Ա/Ձ Հրայր Մանուկյանին և «Արցախ Կաթ» ՓԲԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգով ներկայացված հիմքերը, պարզեցի հետևյալը.

1. ՀՀ ֆինանսների նախարարության ներկայացրած փաստերը և պահանջը.

ՀՀ ֆինանսների նախարարությունը, ՀՀ պաշտպանության նախարարության (այսուհետ՝ Պատվիրատու) 13.08.2018թ. թիվ ԴՎԱ/3049 և 14.09.2018թ. թիվ ԴՎԱ/3475 գրությունների հիման վրա, 27.08.2018թ. թիվ 01.1/26-3/15357-18 և 18.09.2018թ. 01.1/26-/[1256766]-18 գրություններով դիմել է ՀՀ գնումների հետ կապված բողոքներ քննող անձին՝ խնդրելով նախաձեռնել Ա/Ձ Հրայր Մանուկյանին և «Արցախ Կաթ» ՓԲԸ-ին

(այսուհետ՝ Կոնսորցիում) գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

2. Ա/Ձ Հրայր Մանուկյանի ներկայացրած փաստարկները և դիրքորոշումը.

Ա/Ձ Հրայր Մանուկյանը, պատշաճ ծանուցված լինելով ՍՅ-ԱՄ-2018/125 ընթացակարգի շրջանակներում 30.08.2018թ. ժամը 10:35-ին հրավիրված նիստի վերաբերյալ, ապահովել է իր ներկայացուցչի մասնակցությունը, ով հայտնել է, որ պայմանագրով նախատեսված ապրանքը Ա/Ձ Հրայր Մանուկյանի կողմից չի մատակարարվել տեխնիկական խնդիրների պատճառով:

3. «Արցախ Կաթ» ՓԲԸ-ի ներկայացրած փաստարկները և դիրքորոշումը.

ՀՀ գնումների հետ կապված բողոքներ քննող անձի սույն որոշումը կայացվելու օրվա դրությամբ «Արցախ Կաթ» ՓԲԸ-ի կողմից որևէ դիրքորոշում չի ներկայացվել:

«Արցախ Կաթ» ՓԲԸ-ն, պատշաճ ծանուցված լինելով ՍՅ-ԱՄ-2018/125 ընթացակարգի շրջանակներում 30.08.2018թ. ժամը 10:35-ին հրավիրված նիստի վերաբերյալ, չի ապահովել իր ներկայացուցչի մասնակցությունը:

4. ՀՀ պաշտպանության նախարարության կողմից ներկայացված փաստարկները և դիրքորոշումը.

ՀՀ պաշտպանության նախարարությունը ՀՀ ֆինանսների նախարարությանն ուղղված 13.08.2018թ. թիվ ԴՎԱ/3049 և 14.09.2018թ. թիվ ԴՎԱ/3475 գրություններով հայտնել է, որ հիմք ընդունելով ՀՀ պաշտպանության նախարարության և Ա/Ձ Հրայր Մանուկյանի և «Արցախ Կաթ» ՓԲԸ-ի կոնսորցիումի (այսուհետ՝ Կոնսորցիում) միջև 06.11.2017թ. կնքված «ԳՀԱՊՁԲ-7/89-1» գնման պայմանագրի (այսուհետ՝ Պայմանագիր) 2.1.7.1 ենթակետի «բ» պարբերության պահանջը՝ ՀՀ պաշտպանության նախարարությունը 09.08.2018թ.

միակողմանի մասնակի լուծել է Պայմանագիրը և դրան կից 16.04.2018թ. կնքված թիվ 1 համաձայնագիրը:

Նշված գրությամբ Պատվիրատուն հայտնել է նաև, որ Պայմանագրի լուծման վերաբերյալ գրությունը 10.08.2018թ. ուղարկվել է մասնակցի պաշտոնական էլեկտրոնային փոստի հասցեով և նույն օրը հրապարակվել է www.gnumner.am հասցեով ինտերնետային կայքում:

Պատվիրատուն, պատշաճ ծանուցված լինելով ՍՑ-ԱՄ-2018/125 ընթացակարգի շրջանակներում 30.08.2018թ. ժամը 10:35-ին հրավիրված նիստի վերաբերյալ, չի ապահովել իր ներկայացուցչի մասնակցությունը:

5. ՍՑ-ԱՄ-2018/125 ընթացակարգի քննության համար էական նշանակություն ունեցող փաստերը.

ՍՑ-ԱՄ-2018/125 ընթացակարգի քննության համար էական նշանակություն ունեն հետևյալ փաստերը՝

1. ՀՀ պաշտպանության նախարարության և Ա/Ձ Հրայր Մանուկյանի և «Արցախ Կաթ» ՓԲԸ-ի կոնսորցիումի միջև 06.11.2017թ. կնքվել է թիվ «ԳՀԱՊՁԲ-7/89-1» գնման պայմանագիրը, որի համաձայն Կոնսորցիումը պարտավորվել է Պայմանագրի տեխնիկական բնութագիր- գնման ժամանակացույցին համապատասխան Պատվիրատուին մատակարարել համապատասխան ապրանք:

2. Ա/Ձ Հրայր Մանուկյանին ուղղված 10.08.2018թ. թիվ ԴՎԱ/3021 գրությամբ ՀՀ պաշտպանության նախարարությունը միակողմանի մասնակի լուծել է Պայմանագիրը և դրան կից 16.04.2018թ. կնքված թիվ 1 համաձայնագիրը:

6. ՀՀ գնումների հետ կապված բողոքներ քննող անձի հիմնավորումները և եզրահանգումը.

ՀՀ գնումների հետ կապված բողոքներ քննող անձ՝ Մհեր Անանյանս, ուսումնասիրելով ՀՀ ֆինանսների նախարարության 27.08.2018թ. թիվ 01.1/26-3/15357-18 և 18.09.2018թ.

01.1/26-/1256766]-18 գրությունները, ՀՀ պաշտպանության նախարարության 13.08.2018թ. թիվ ԴՎԱ/3049 և 14.09.2018թ. թիվ ԴՎԱ/3475 գրությունները և կից փաստաթղթերը, հայտնում եմ հետևյալը.

ՀՀ քաղաքացիական օրենսգրքի 345-րդ հոդվածի 1-ին մասի. համաձայն՝ պարտավորության ուժով մի անձը (պարտապանը) պարտավոր է մեկ այլ անձի (պարտատիրոջ) օգտին կատարել որոշակի գործողություն. այն է՝ վճարել դրամ, հանձնել գույք, կատարել աշխատանք, մատուցել ծառայություն և այլն, կամ ձեռնպահ մնալ որոշակի գործողություն կատարելուց, իսկ պարտատերն իրավունք ունի պարտապանից պահանջել կատարելու իր պարտականությունը:

Նույն օրենսգրքի 405-րդ հոդվածի համաձայն՝ պարտավորության խախտում է համարվում այն չկատարելը կամ անպատշաճ (կետանցով, ապրանքների, աշխատանքների և ծառայությունների թերություններով կամ պարտավորության բովանդակությամբ որոշվող այլ պայմանների խախտմամբ) կատարելը:

«Գնումների մասին» ՀՀ օրենքի (այսուհետ նաև՝ Օրենք) 6-րդ հոդվածի 1-ին մասի 6-րդ կետի համաձայն՝ բացառությամբ նույն օրենքի 23-րդ հոդվածի 1-ին մասի 1-ին, 3-րդ, 4-րդ և 5-րդ կետերով նախատեսված ընթացակարգով գնում կատարելու դեպքերի, գնումների ընթացակարգերին մասնակցելու իրավունք չունեն այն անձինք, որոնք հայտը ներկայացնելու օրվա դրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. **խախտել է պայմանագրով նախատեսված** կամ գնման գործընթացի շրջանակում ստանձնած **պարտավորությունը, որը հանգեցրել է պարվիրատուի կողմից պայմանագրի միակողմանի լուծմանը** կամ գնման գործընթացին տվյալ մասնակցի հետագա մասնակցության դադարեցմանը,

բ. որպես ընտրված մասնակից հրաժարվել է պայմանագիր կնքելուց,

գ. հայտերը բացելուց հետո հրաժարվել է գնման գործընթացին հետագա մասնակցությունից:

Օրենքի 6-րդ հոդվածի 2-րդ մասը սահմանում է, որ գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների

հիման վրա լիազորված մարմինը ընթացակարգ է նախաձեռնում գնումների հետ կապված բողոքներ քննող մարմնում՝ առանց վճարի: Տվյալ մասնակցի կարծիքը լսելուց հետո գնումների հետ կապված բողոքներ քննող անձը սույն օրենքի 50-րդ հոդվածի 6-րդ մասով սահմանված ժամկետում որոշում է կայացնում մասնակցին սույն հոդվածով նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

Օրենքի 30-րդ հոդվածի 6-րդ մասի 3-րդ կետի համաձայն՝ մասնակիցները կարող են գնման գործընթացին մասնակցել համատեղ գործունեության կարգով (կոնսորցիումով): Մասնակիցները կրում են համատեղ և համապարտ պատասխանատվություն:

«Կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 33-րդ կետի 3-րդ ենթակետի համաձայն՝ պայմանագրով (նախագծով) սահմանվում է նաև, որ համատեղ գործունեության (կոնսորցիում) դեպքում մասնակիցները կրում են համատեղ և համապարտ պատասխանատվություն: Ընդ որում, կոնսորցիումի անդամի կոնսորցիումից դուրս գալու դեպքում կոնսորցիումի հետ պատվիրատուի կնքած պայմանագիրը միակողմանիորեն լուծվում է, և կոնսորցիումի անդամների նկատմամբ կիրառվում են պայմանագրով նախատեսված պատասխանատվության միջոցները:

«Կաշտպանության նախարարության և Ա/Ձ Հրայր Մանուկյանի և «Արցախ Կաթ» ՓԲԸ-ի կոնսորցիումի միջև 06.11.2017թ. կնքվել է թիվ «ԳՀԱՊՁԲ-7/89-1» գնման պայմանագիրը:

Պայմանագրի 1-ին կետի 1.1 ենթակետով վաճառողը (Կոնսորցիումը) պարտավորվել է Պայմանագրով սահմանված կարգով, ծավալներով, ժամկետներում և հասցեով գնորդին («Կաշտպանության նախարարություն») մատակարարել Պայմանագրի թիվ 1 հավելվածով՝ տեխնիկական գնութագիր-գնման ժամանակացույցով նախատեսված ապրանքը, իսկ գնորդը պարտավորվել է ընդունել ապրանքը և վճարել դրա համար՝ համաձայն թիվ 2 հավելվածի (վճարման ժամանակացույց):

Պայմանագրի գնման ժամանակացույցով նախատեսվել է, որ ապրանքների մատակարարումը կիրականացվի համապատասխան ֆինանսական միջոցներ նախատեսվելու դեպքում՝ կնքվելիք համաձայնագրով սահմանված ժամկետում:

Նույն արձանագրության համաձայն՝ զորամասի ներքին ստուգող հանձնաժողովի կողմից իրականացված արտաքին զննության արդյունքում ուսումնասիրված 280 տուփերից 17-ը գտնվում էին գործարանային փաթեթավորումը խախտված վիճակում, մասնավորապես տուփերի վրայի փաթիթեղները բացված էին:

Արձանագրության համաձայն՝ վերոհիշյալ նյութական միջոցները չեն համապատասխանում պայմանագրի տեխնիկական բնութագրի պահանջներին, որի հետևանքով խմբաքանակը հետ է վերադարձվել մատակարարին:

Ա/Ձ Հրայր Մանուկյանին ուղղված 10.08.2018թ. թիվ ԴՎԱ/3021 գրությամբ ՀՀ պաշտպանության նախարարությունը հայտնել է, որ Կոնսորցիումի կողմից Պայմանագրի համաձայն պետք է մատակարարվեր ընդհանուր 118 450 կգ «մածուն՝ կովի կաթից (Մածուն)» ապրանքատեսակը, որից 46 900 կգ՝ մինչև 24.07.2018թ., սակայն մինչև նշված օրը մատակարարվել է ընդամենը 5250 կգ:

Նշված գրությամբ Պատվիրատուն հայտնել է, որ հիմք ընդունելով Պայմանագրի 2.1.7.1 ենթակետի «բ» պարբերության պահանջը՝ Պայմանագրի 1-ին, 2-րդ և 3-րդ չափաբաժինների մասով 09.08.2018թ. միակողմանի լուծել է Պայմանագիրը և դրան կից 16.04.2018թ. կնքված թիվ 1 համաձայնագիրը:

Այսպես՝ ՀՀ պաշտպանության նախարարության և Ա/Ձ Հրայր Մանուկյանի և «Արցախ Կաթ» ՓԲԸ-ի կոնսորցիումի միջև 06.11.2017թ. կնքվել է «ԳՀԱՊՁԲ-7/89-1» գնման պայմանագիրը, իսկ այնուհետև 16.04.2018թ. կնքվել է Պայմանագրի թիվ 1 համաձայնագիրը, որի համաձայն Կոնսորցիումը պարտավորվել է Համաձայնագրի թիվ 1 հավելվածով նախատեսված ժամկետներում մինչև 18.12.2018թ. Պատվիրատուին մատակարարել ընդհանուր 118 450 կգ «մածուն՝ կովի կաթից (Մածուն)» ապրանքատեսակը (այսուհետ՝ ապրանք): Ընդ որում՝ գնման ժամանակցույցի համաձայն՝ կոնսորցիումը պարտավորվել է համապատասխան քանակի մատակարարումներն իրականացնել ըստ համապատասխան ամիսների հստակ օրերի:

Մասնավորապես գնման ժամանակացույցի համաձայն՝ Կոնսորցիումը 24.07.2018թ. դրությամբ Պատվիրատուին պետք է մատակարարել ընդհանուր՝ 46 900 կգ ապրանք, մինչդեռ Կոնսորցիումի կողմից մատակարարվել էր ընդամենը 5 250 կգ ապրանք:

Պայմանագրի 2-րդ կետի 2.1.7 ենթակետի համաձայն՝ Պատվիրատուն իրավունք ունի միակողմանի լուծել պայմանագիրը (լրիվ կամ մասնակի), եթե վաճառողն էականորեն խախտել է պայմանագիրը:

Նույն ենթակետի 2.1.7.1 կետի «բ» պարբերության համաձայն՝ վաճառողի կողմից պայմանագիրը խախտելն էական է համարվում, եթե ապրանքի մատակարարման ժամկետները խախտվել են 40 օրից ավելի:

Այսպիսով՝ արձանագրում են, որ Ա/Ձ Հրայր Մանուկյանի և «Արցախ Կաթ» ՓԲԸ-ի կոնսորցիումը թույլ է տվել 06.11.2017թ. թիվ «ԳՀԱՊՁԲ-7/89-1» պայմանագրի 2.1.7.1 կետի «բ» պարբերությամբ նախատեսված էական խախտում, որի հետևանքով Պատվիրատուն միակողմանի մասնակի լուծել է պայմանագիրը, քանի որ Կոնսորցիումի կողմից մատակարարման ժամկետները խախտվել են 40 օրից ավելի:

Պայմանագրի 8-րդ կետի 8.1.2-րդ ենթակետով սահմանվել է, որ քանի որ Պայմանագիրն իրականացվում է համատեղ գործունեության (կոնսորցիում) պայմանագիր կնքելու միջոցով «Արցախ Կաթ» ՓԲԸ-ի հետ, ապա մասնակիցները կրում են համատեղ և համապարտ պատասխանատվություն:

ՀՀ քաղաքացիական օրենսգրքի 360-րդ հոդվածի համաձայն՝ այն դեպքում, երբ պարտավորությանը մասնակցում են մի քանի պարտատեր կամ մի քանի պարտապան, պարտատերերից յուրաքանչյուրն իրավունք ունի պահանջել կատարելու պարտավորությունը, իսկ պարտապաններից յուրաքանչյուրը պարտավոր է այն կատարել մյուսների հետ հավասար բաժնով, եթե այլ բան չի բխում օրենքից, այլ իրավական ակտերից կամ պարտավորության պայմաններից:

Նույն օրենսգրքի 361-րդ հոդվածի համաձայն՝

1. Համապարտ պարտականությունը (պատասխանատվությունը) կամ համիրավ պահանջը ծագում է, եթե պարտականության համապարտությունը կամ պահանջի համիրավությունը նախատեսված է պայմանագրով կամ սահմանված է օրենքով, մասնավորապես, եթե անբաժանելի է պարտավորության առարկան:

2. Ձեռնարկատիրական գործունեության հետ կապված պարտավորությամբ մի քանի պարտապանների պարտականությունները համապարտ են, իսկ պարտատերերի

պահանջները՝ համիրավ, եթե այլ բան նախատեսված չէ օրենքով, այլ իրավական ակտերով կամ պարտավորության պայմաններով:

«Քաղաքացիական օրենսգրքի 362-րդ հոդվածի 1-ին մասի համաձայն՝ պարտապանների համապարտ պարտականության դեպքում պարտատերն իրավունք ունի, ինչպես բոլոր պարտապաններից համատեղ, այնպես էլ յուրաքանչյուրից պահանջել կատարելու պարտավորությունն ինչպես լրիվ, այնպես էլ պարտքի մի մասով:

«Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում խախտել է պայմանագրով նախատեսված պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը:

Օրենքի 30-րդ հոդվածի 6-րդ մասի 3-րդ կետի համաձայն՝ կոնսորցիումի մասնակիցները կրում են համատեղ և համապարտ պատասխանատվություն:

Այսպիսով՝ հաշվի առնելով վերոգրյալը, ինչպես նաև հիմք ընդունելով այն հանգամանքը, որ Պայմանագիրն իրականացվել է համատեղ գործունեության (կոնսորցիում) պայմանագիր կնքելու միջոցով՝ գտնում են, որ Ա/Ձ Հրայր Մանուկյանի և «Արցախ Կաթ» ՓԲԸ-ի կողմից թույլ է տրվել «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետի խախտում, ուստի առկա են վերջիններիս գնումների գործընթացին մասնակցելու իրավունք չունեցող մասնակիցների ցուցակում ներառելու հիմքերը:

«Գնումների մասին» ՀՀ օրենքի 6-րդ հոդվածի 2-րդ մասի համաձայն՝ անձը գնումների գործընթացին մասնակցելու իրավունք չունեցող մասնակիցների ցուցակում ընդգրկվում է երկու տարի ժամկետով:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասի 2-րդ կետով՝

Ո Ր Ո Շ Ե Ց Ի

Հայաստանի Հանրապետության ֆինանսների նախարարության 27.08.2018թ. թիվ 01.1/26-3/15357-18 և 18.09.2018թ. 01.1/26-/[1256766]-18 գրություններով Ա/Ձ Հրայր Մանուկյանին (ՀՎՀՀ՝ 92103429) և «Արցախ Կաթ» ՓԲԸ-ին (ՀՎՀՀ՝ 90010282) գնումների

գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը բավարարել և Ա/Ձ Հրայր Մանուկյանին և «Արցախ Կաթ» ՓԲԸ-ին ընդգրկել գնումների գործընթացին մասնակցելու իրավունք չունեցող մասնակիցների ցուցակում՝ ՀՀ գնումների հետ կապված բողոքներ քննող անձի որոշումն ուժի մեջ մտնելու օրվանից հաշված երկու տարի ժամկետով:

ՀՀ գնումների հետ կապված բողոքներ քննող անձի որոշումն իրավապարտադիր է:

ՀՀ գնումների հետ կապված բողոքներ քննող անձի որոշումը կարող է բողոքարկվել դատական կարգով:

**Գնումների հետ կապված
բողոքներ քննող անձ՝**



ՄՀԵՐ ԱՆԱՆՅԱՆ